

Dithero tsa Tirelano mo Kutlwanong

25/2015 Thero ka Sontaga o o bidiwang Jubilate, e le ka 25. 04. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno le kwadilwe mo go 2 Bakor. 5:17, le re: "Ka moo he, fa motho a le mo go Keresete, o a bo a le sebopiwa se sešwa, dilo tsa bogologolo di fetile, bonang, di ntšhwafaditswe tsotlhe!"

1. Sefela sa 227 - 213/221

2. Thapelo: Modimo, Mong-wa-thata-tsotlhe, o o se nang tshimologo, le e seng bokhutlo, o o tlhomileng kgolaganyo e ntšhwa wa tetlanyo ka kgakgamatso e e diragetseng ka tsogo ya ga Morwao, re a kopa gore o abele botlhe ba ba tsetsweng sešwa go nna mo kopanong ya mmele wa ga Keresete ba supe mo botshelong jwa bone se ba se ipolelang ka tumelo ya bone, o re utlwe ka ntlha ya ga Jesu Keresete Morena wa rona yo o tshelang, a busa mmogo le wena le Mowa o o Boitshepo, Modimo o e leng o le mongwe fela jaanong le ka bosakhutleng. Amen.

3. Lefoko la Testamente e kgologolo le kwadilwe mo go Gen. 1:1-4a. 26-31a; 2:1-4a.

Epistolo ka fa thulaganyong ya 2 e kwadilwe mo go 1 Johane 5:1-4;

Efangele ka fa thulaganyong ya 3 e kwadilwe mo go Johane 16:16-23a.

4. A go ipolelwe tumelo ya bokeresete!

5. Sefela sa 234 - 219/227

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Johane 15:1-8, e re: "'Ke nna setlhare sa moweine sa nnete; Rre ke molemi wa moweine. Kala nngwe le nngwe e e mo go nna e e sa ungweng leungo, o a e tlosa; mme nngwe le nngwe e e ungwang leungo, o a e tlokotla gore e tle e ungwe segolo. Lona lo setse lo tlokotlilwe ka ntlha ya lefoko le ke le buileng le lona. Nnang mo go nna, le nna ke nne mo go lona; gonne ga lo ka ke lwa ungwa, fa lo sa nne mo go nna, jaaka kala e sa ka ke ya ungwa ka boyona, fa e sa nne mo

moweineng. Ke nna setlhare sa moweine, lona lo dikala. Yo o nnang mo go nna le nna ke le mo go ene, o ungwa maungo a mantsi; gonne kwa ntle ga me ga lo ka ke lwa dira sepe. Fa motho a sa nne mo go nna, o latlhelwa kwa ntle, jaaka kala e latlhelwa kwa ntle, e omelele, mme di kokwanngwe, di latlhelwe mo molelong, di fisiwe. Fa lo nna mo go nna, le mafoko a me a nna mo go lona, lo ka kopa se lo se ratang, se tla lo dirafalela. Se Rre a ka galalediwang ka sona ke fa lo ungwa maungo a mantsi, lo nna barutwa ba me." Amen.

8. Thero: Ditsala tse di rategang tsa Morena le Mopholosi Jesu Keresete, o sa tshela, o tsogile sentle + Haleluja! + Ga se moswi, mme ke motswedi wa nnete, le bogare jwa botshelo. Lebitla le ne le sa kgone go mo golega, mme la mo neela tsela e le Mofenyi ka letsatsi la boraro. O beilwe mo bogosing ka fa le le jang le Modimo Rraagwe mo legodimong, o a tshela, le go busa ka thata yotlhe mo legodimong le mo lefatsheng. Loso, le masula, le Satane ba ne ba sa kgone go mo thibela mo phupung, mme o fenyetse ruri ka phenyo e e nnelang ka bosakhutleng. Ga se toro fela, le e seng kakanyo fela, ke se se diragaletseng ruri, ke sa boammaaruri jo bo sa tshikinyegeng. A go lebogelwe tsogo ya Morena le Modimo wa rona. Ke Keresete yo o tshelang tota, o o le mongwe fela le Rraagwe mmogo le Mowa o o Boitshepo. Ga se medimo e le meraro, mme ke Modimo o le mongwe fela o o godimo ga botlhe le tsotlhe. Ga go na ope, ga go na sepe se se mo godimo go ona. Yo o neng a re swela mo sefapaanong ke ene yo e le Mmusi wa thata yotlhe, le Kgosi ya botlhe. A a galalediwe, le go tlotliwe ene go ya bosakhutleng!

Morena yo o esi yo o itshwantsha le setlhare sa moweine sa nnete, e le tshimologo le motswedi wa botshelo. Ke Motlhodi wa legodimo le lefatsheng, wa tsotlhe tse di bonalang le tse di sa bonaleng. Tsotlhe le se le sengwe se tlhagile mo go one, ka one le ka ntlha ya ona. Modimo "wa budulela mowa wa botshelo mo dinkong tsa gagwe, motho a nna motshedi jalo." Ke thata ya botshelo jwa Modimo e e dirang gore dipelo tsa rona di opaope ka madi mo ditshikeng tsa rona, diretlo, gongwe dirwe tsa mmele, e bong sebete, makgwafo, pelo le diphilo, diatla, maoto le dinao, le tse dingwe di dire tiro ya tsona sentle, re tshela sentle ka ntlha thato e e molemo ya ona, le bopelotlhomogi jwa ona. O re baakantse gore re nne dibopiwa tse di tshelang, e le batho, dipobiwa tsa nnete tsa Motlhodi a le mongwe yo. Tota-tota ke ka go kopanngwa le ona le ka go fiwa madi a a tshelang ke ona a a teng mo ditshikeng tsa rona, fa re re le batshedi. Fa re ka kgaoganngwa le ona, re tla swaba, go boduma, go ngotlafala, le go swa fela ka pele. Re tshwantshiwa le dithunya tse dintle tsa

naga gongwe bojang, fa bo segwa, bo swaba ka pele, go sa tlhole go bonala bontle bope jwa pele. Bo latlha fela. Ke se se diragalang ka kala nngwe le nngwe, fa e kgaotswe mo weineng. Fa tlhoka e tlhoka metswetsweno ya moweine, dikala di tla swaba ka pele, di sa ungwe sepe, di se na thuso epe. Mme fa e tshwaragantswe le moweine, kala eo e tla ungwa maungo a a monate, e le neo e e itumedisang ya legodimo, ka fa maikaelelong a Modimo.

Morena wa rona a re: Re kopantswe le ene, jaaka dikala tse di tshelang, re kopantswe le ene yo e leng setlhare sa moweine wa nnete. Seo ga se se rona re tshwanetseng go se ipaakanyetsa, mme ke se re se baakannyeditsweng ke ene, ke motheo o o tlhomameng o o tshegetsatsa botshelo jwa rona. Ke se se dirang, gore re tshele sentle. A a lebogwe ene yo e leng Motlhodi wa rona yo o kutlwelobotlhoko le bopelontle. Ka tseo go bonala le tse dingwe tse dikgolo. Ka moo re lebogela lefoko le le boitshepo la gagwe, le kolobetso e e re kopantseng le ene. Kana Lefoko la gagwe le dira se le se rometsweng. Le re senoletse kgomotso e kgolo, fa ene e le setlhare sa moweine sa nnete, rona re dikala tsa gagwe. Ke sa boammaaruri, le fa re sa bone tse dintsi tsa bontle joo mo botshelong jwa rona. Ke se re se baakannyeditsweng ke ene, jaaka a bua gore ke lefoko la boammaaruri. O ikanyegile. O dira se a se solofetsang. Ke se se diragetseng tota mo botshelong jwa rona. Go di tlhomamisa bogolo mo dipelong tsa rona, o ntse a re gakolola, fa re kolobeditse. Mo kolobetsong ya rona re kopantswe le ene le tiro ya gagwe ka fa thatong ya bopelotlhomogi, lorato le maikaelelo a go re thusa a gagwe. Bona, ka kolobetso e e boitshepo re fitlhlwe le ene mo losong lwa gagwe, le mo lebitleng, le mo sefapaanong. Ka jalo bolelele jwa rona, mmogo le go tlhoka tumelo, le tlhago e e bosula ya rona di bolaetswe ruri. Ke tsa bogologolo ka fa katlholong e e nang le thata ya Modimo. Ke botlhanngwe fela jwa ledi gongwe jwa tiragalo. Jo bongwe ke botlhanngwe jo bo botoka thata, gonne bo re senolela, fa re tsetswe sešwa ka yona kolobetso eo, re tlhodilwe sešwa ke Modimo ka tiro e ntšhwa ya tlholego, re filwe botsalo jo bošwa ka bopelotlhomogi jwa Modimo mmogo le tsogo ya Morena Jesu Keresete. Ke gona re basiami, botshelo jwa Modimo bo opaopa mo ditshikeng tsa rona go tshela mo go Keresete. Ke se se bolayang bolelele mo go rona, se re atlholela, fa loso lo tlositse, le Satane o latlhlwe. Ga re tlhole re tshela rona, mme ke Jesu yo o tshelang mo go rona. Ka jalo sa bogologolo se fetile, tsotlhe di ntšhwafaditswe. A go lebogwe Modimo, o o re bileditseng mo botshelong jo bošwa joo ka Efangele e e boitshepo ya ga Morwaaona Jesu Keresete. Ke ka ntlha ya moo, fa Morena a bitsa barutwa ba gagwe, fa ba itshekisitswe, ba dirilwe go nna baitshepi. Re ba Modimo jaanong, ba losika lwa ona. Ke kemo ya rona jaanong. A go lebogelwe

bopelotlhomogi jwa Modimo. Galaletsang leina la ona o o dirang dikgakgamatso ka malatsi otlhe mo botshelong jwa rona.

Jaaka kala nngwe le nngwe e tshela fela, fa e kopantswe le setlhare, jaaka kala ya selhare sa olefa sa naga sa lomolelwa mo setlhareng sa olefa sa legae sa morafe wa Modimo, rona re bona botshelo jwa rona mo Moreneng wa rona Jesu Keresete jaanong. Ga re kgone go ipaakanyetsa sepe, mme re abelwa tsotlhe ke ene, re itshwarelwa maleo, o re sikara mmogo le makoa, dikhutsafalo, le matsapa a rona, o re tshedisa ka lorato lwa gagwe, ka ntlha ya bopelonomi le bopelotlhomogi ka e le Rara le Modimo wa rona. O re tlamela thata ka malatsi ka tsotlhe tse re di tlhokang mo botshelong jono. Re amogedi ba dineo tsa ona. Ke ona Modimo, re batho ba ona. Ke setlhare sa moweine wa nnete, rona re dikala. Kwa ntle ga Morena wa rona Jesu Keresete ga re ka ke ra dira sepe. Kwa ntle ga gagwe ga re ba sepe. Tloga mo go ene, ke fa o tla kgaoganngwa le molemo otlhe, o tlogelelwa mo khumanegong ya gago. Yo o le kang go ipusa jalo, o tla bo a tlogetswe ke molemo otlhe. O tla swaba fela, go swa fela.

Mme go setse molaetsa o o itumedisang. Go tswa mo tshimologong Morena wa rona o ne a sa rate go kgaoganngwa le rona, o rata go nna gaufi le rona, le go nna Morena mo botshelong jwa rona. Ke sona se a se ratang, ke maikaelelo a lorato lwa gagwe. Ke ka ntlha ya moo, fa a logile dikgole gore a re goge ka tsona. O dira ka ditshisa tshegofatso, ka go itsenya ka nosi mo tirong go re senka, le go nna le rona, go re otlha, go re jesa, le go re nosa gore re ungwe maungo a a molemo. Tseo ga di diragale fela dibeke dingwe mo ngwageng, mme ka nako ya letsatsi lengwe le lengwe mo ngwageng mongwe le mongwe o rata go re busetsa mo parateiseng go kopana le ene, le fa mo ditirelong tsa Modimo, gongwe mo dithapelong ka malatsi otlhe. Tseo di tla dirafadiwa ka botlalo, fa re tla gorosiwa mo bofelong mo legaeng la legodimo mo kgalalelong e e sa feleng.

Go molemo go itse, fa Morwa Modimo Jesu Keresete a sa dire tiro eo a le nosi fela, nyaya, Rraagwe o dira mmogo le ene. Le ene o leka go re boloka gore re nnele ruri mo go ene, re se kgaoganngwe le ene. Ke ene Molemi mo tshimong ya gagwe. O tlhokomela tshimo le tlholego ya gagwe. Go tswa mo tshimologong o ne a rata gore o direlane le ene mo tirong ya gagwe. E ne e le maikaelelo a gagwe go tswa mo tshimologong, fa a re tlhodile. O re tlhaoletse go nna badira mmogo le ene, go nna tokololo e e tshelang mo kerekeng ya bokeresete, e madi a botshelo jwa gagwe a opaopa mo go yona, e le madi a re a tshologeletsweng go nna boitshwarelo jwa dibe, e le tsela e e tla re gorosang mo botshelong jo bo sa khutleng le mo

pholosong e e leng lesego le le nnelang ruri. Ke gona Rara mmogo le Morwa ba roma Mogomotsi, e bong Mowa o o Boitshepo go re itshekisa ka ditshisabopelotlhomogi go re bolokela mo tumelong ya nnete e e ikanyang gore Modimo o o tshelang wa rona o a re pholosa, le go re golola, le go re balela tshiamo ka boitshwarelo jwa maleo otlhe a rona ka ntlha ya ga Keresete. O re tshedisa ka mafoko a gagwe a tsholofetso ya Modimo, gore re tlhomamisediwe mo kitsong, fa re sa tlhole re lathwa, mme re tshele, re itshwarelwe, le go itshepisediwe go ungwa tse di molemo le maungo a a siameng go o galaletsa, le go leboga ka maungo a a siameng.

Ekte o rata go tlhomamisa tseo, ka moo o a oketsa ka go solofetsa gore "Fa lo nna mo go nna, le mafoko a me a nna mo go lona, lo ka kopa se lo se ratang, se tla lo dirafalela." Ka ntlha tsholofetso eo re rapela, re ikantse ka boitumelo, re re: Modimo le Rara yo o rategang, o re abele go nnela ruri mo go wena, gore re nne re ikanyege ka go ngaparela lefoko la gago le le boitshepo le e leng boammaaruri le thata ya go pholosa botlhe ba ba le dumelang, o be o re thuse gore re tshele ka fa thatong e e boitshepo ya kutlwelobotlhoko ya gago e le thato e e ratang gore re abelwe tse di molemo fela, le bakaulengwe ga rona fela jalo, ke raya tse di molemo mo go Jesu Keresete Morena yo o esi, le Modimo o o tshelang, a busa mmogo le wena le Mowa o o Boitshepo, Modimo o o osi fela ka bosakhutleng. Amen.

- 9. Thapelo:** Modimo, Mong-wa-thata-yotlhe, o ntšhwafatsa sefatlhego sa lefatshe ka metlha, ka fa thatong e e rategang ya gago o rata go ntšhwafatsa le batho ba ba wetseng mo boleong le mo losong, o re abele gore re ithute go farologanya ka go dumela mo go Morwao botshelo jwa nnete le jona jo bo isang mo tatlhegong gore re nne ba tlholego e ntšhwa ya gago, re ikanye Morwao yo o tshelang, a buse mmogo le wena le Mowa o o Boitshepo, Modimo o le mongwe fela jaanong le ka bosakhutleng. Amen.

Thapelo ya Morena: Rara wa rona yo o mo legodimong ...

- 10. Sefela sa 255 - 237/247**

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. P. P. W. Weber, ka ngwaga wa 2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.